

### 大總統誓詞

余誓以至誠遵守憲法執行大總統之職務謹誓

### 大總統蒞任宣言書

余不才忝居政界數十年向持穩健主義以爲立國大本在修明法度整飭紀綱而後應時勢之所宜合人羣而進化故歷辦革新諸政凡足以開風氣者必一一圖之但余取漸進而不取急進以國家人民之重未可作孤注之一擲而四千年先民之教澤尤不可使斷喪無餘也戊申以後歸田課耕不復與聞政事生平救國之志已如過眼煙雲乃武漢事起爲時勢所迫身當其衝大懼吾國吾民之無以生存而思減少其苦痛後清帝遜位共和告成以五大族之不棄推爲臨時大總統此種政體吾國四千年前已有雛形本無足異乃事權牽掣無可進行夙夜徬徨難安寢饋然且忍之又忍希望和平乃本年七月間少數暴民破壞統一頓覆國家此東亞初生之民國端緒焉將不保余爲救國救民計不得已而用兵幸人心厭亂將士用命不及兩月內亂戢平極思解職歸田長享共和幸福而國民會議羣相推舉各友邦又有余被選之日爲承認之期何敢高蹈鳴謙以致搖動國基負我父老子弟之期望蓋余亦國民一分子耿耿此心但知救國救民成敗利鈍不敢知勞逸毀譽不敢計是以勉就茲職今將以余極誠懇親愛之意與我國民一言之

西儒恒言立憲國重法律共和國重道德願道德爲體而法律爲用今將使吾民一躍而進爲共和國民不得不借法律以輔道德之用余歷訪法美各國學問家而得共和定義曰共和政體者采大衆意思制定完全法律而大衆嚴守之若法律外之自由則共恥之此種守法習慣